

Powšitkowne WOZJEWJENJA

njedźelu, 22. apryla 2018

Požohnowanje motorskich

Popołdno z požohnowanjom motorskich zahaji so tutu njedźelu, 22. apryla, w 14 hodź. z nyšporom w Ralbičanskej cyrkwi. Přizamknje so zhromadny wulět.

Duchowna hudźba z gosplemi a spiritualem

Lipšćanski gospelowy chór pod nawodom Maika Gosdzinskeho wuhotuje tutu njedźelu, 22. apryla, wuwzaćnje hižo w 17.00 hodź., w Budyskej cyrkwi Našeje lubeje knje-nje „Duchownu hudźbu“. Zaklinča gosple a spirituale. Wšitcy su wutrobnje přeprašeni. Zastup je darmotny.

Zawod do nabožneho tydźenja

Pomocnicy lětušeho nabožneho tydźenja su wutrobnje na zawodne zarjadowanje přeprašeni, kotrež wotměje so pónđzelu, 7. meje, wot 9.30 hodź hač do něhdže 14 hodź. w Budyšinje na farje, Při Pětrowej cyrkwi 7. Wobdźělnikam sposrědkuja přehlad wo jednotliwych dnjach a wobsahach, bibliskich stawiznach a spěwach kaž tež wo kreatiwnych poskitkach. Zajimcy njech so prošu hač do wutory, 24. apryla, pod telefonowym čisłom (03 57 96) 88 707 abo z mailku na worklecy-kise@gmx.de přizjewja.

Džěci njech spěwaja sobu

Projektowy chór serbskich džěci wobrubu Božu mšu lětušeho putnikowanja starych a chorych ludźi, kotraž budže sobotu, 12. meje, w Róžeńće. Zajimowane džěci su wutrobnje přeprašene sobu spěwać. Proba k tomu budže sobotu, 5. meje, wot 9 do 14 hodź. we Worklečanskim Don Boskowym domje. Witani su tež wšitcy, kotrež hewak w šoli njespěwaja. Dalše informacije dóstanjeće w Don Boskowym Domje abo pola wjednikow jednotliwych šolow. Přizjewić měli so zajimcy hač do srjedy, 2. meje, pod telefonowym čisłom (03 57 96) 8 87 07 abo z mailku na worklecy-kise@gmx.de

Projektowy chór za putnikowanje młodžiny

Młodostni, kotřiž rady spěwaja, su přeprašeni, Božu mšu na putnikowanju młodžiny njedźelu, 27. meje, w Róžeńće wobrubu. Proba na Chróšćanskej farje budžetej pjatk, 4. meje, wot 19.30 hodź. (po kemšach) a sobotu, 12. meje, wot 10 do 12 hodź. Zajimcy njech so prošu we Worklečanskim Don Boskowym domje přizjewja, telefonowe čisło (03 57 96) 9 55 95 abo z mailku na don.boskowy-dom@t-online.de.

Za wulět samostejacych so přizjewić

Termin lětušeho wulěta samostejacych ze serbskich wosadow je nětko jasny. Wón budže štwórtk, 21. junija, a powjedže na hnadowne městno Krzeszów w Pólskej.

Beneficny koncert

Za wjacore socialne projekty w bołharskim měsće Razgradže přewjedže Towarstwo swjateje Filomeny z.t. njedźelu, 29. apryla, wot 14.30 hodź. we Łazku beneficny koncert. Mjez druhim wustupi Carolina Eycec ze svojim tereminom. Koncert wuhotuja sobu Chróšćanscy muzikanća, chór Delany a Smjerdžečanska rejwanska skupina.

Poswjeća pomnik

Na městnje něhdyšeje „krawneje chójny“ při lěsnym puću wot Łomska w směnje na Koslow wotměje so sobotu, 28. apryla, w 14 hodź. ekumeniska, němsko-serbsko-pólska nutrnosť. Na njej wotkryja wopomnjenski kamjeń za pólskeho džělačerja Stanisława Błażejczuka. Wón bu tam 25. apryla 1942 wotprawjeny. Na nutrnosť přeprošuja Njeswačanska wosada, zarjadnistwo gmejny Njeswačidło a Towarstwo přećelow kultury a domizny Njeswačidło z.t. Pomnik poswjećitaj Njeswačanska fararka Susanne Aechtner a Chróšćanski farar Měrćin Deleńk. Docpěć hodži so městno, hdyž napoť puća mjez Koslowom a Njeswačidłom naprawo do lěsa abo z Dobrošic přijěwši we Łomsku na pólny puć nalěwo wotbočiš a so něhdže poł kilometra do lěsa podaš. We Łomsku budže wotpowědne znamjo připrawjene.

Spominanje na fararja Jurja Wingerja

K spominanju na něhdyšeho redaktora Katolskeho Posoła, fararja Jurja Wingerja z nyšporom wutoru, 1. meje, w 19 hodź. w Chróšćicach přeprošujetej Towarstwo Cyrila a Metoda. z.t. a tamniša wosada. Na kóncu budže jeho ponowjeny narowny pomnik při Božim domje znowa poswjećeny. Chróšćanski cyrkwinski chór nyšpor wobrubu. Po nim scěhuje na farje čitanje z twórbow fararja Wingerja, kotryž je před sto lětami zemřel.

Wohnjowi wobornicy do Róžanta

Džakna Boža mša wohnjowych wobornikow ze Zarjadniskeho zwjazka „Při Klóšterskej wodze“ budže na swjedženju swjateho Floriana, pjatk, 4. meje, w 19 hodź. w hnadownej cyrkwi w Róžeńće. Kemše budže Drježdžansko-Mišnjanski biskop Heinrich Timmerevers swjećić. Wšitcy wobornicy kaž tež hosćo su k tomu přeprošeni.

Mjezynarodne putnikowanje k wujednanju

Wěriwi z Pólskeje, Němskeje a Českeje su na mjezynarodne putnikowanje k wujednanju sobotu, 5. meje, do Hejnic w sewjernych Čechach přeprošeni. Hłowny celebrant Božeje mše, kotraž zahaji so w 10.30 hodź. budže Budyski tachantski farar Wito Sćapan. Po kemšach poskića tam wobjed. Popođnju w třoch ma so tak mjenowany Einsiedelstein, ponowjeny wuhladny dypk nad Hejnicami, poswjećić. Putnikowanje měri so wosebje na pólskich, českich, serbskich a němskich wěriwych.

TCM přeprošuje na mejski nyšpor do Róžanta

Na našim serbskim hnadownym městnje w Róžeńće sławmy a prošmy mać Božu wo zastupnu próstwu pola jeje syna Jězu Chrysta za naš lud a kraj: zo bychmy dale žiwje wěрили do zrowastanjeneho Chrystusa. Do paćerja chcemy tež wšu swětowu cyrkej zapřijeć a so wo měr na zemi modlić.

W tutym zmysle přeprošuju w mjenje Towarstwa Cyrila a Metoda z.t. (TCM) wěriwych ze wšitkich wosadow njedzelu, 6. meje, w 17.00 hodź. na wosebity mejski nyšpor do hnadownej cyrkwe w Róžeńće. Chróšćanski cyrkwinski chór jón hudźbnje wobrubu.

Jurij Špitank, předsyda TCM

Putnikowanje do Armenskeje a Georgiskeje

Za putniku jězbu z lětađłom wot wutory, 12. junija, do njedzele, 24. junija, do Georgiskeje a Armenskeje su hišće někotre městna swobodne. Zajimcy měli so hač do njedzele, 13. meje, pola Maćija Hadanka w Hórkach, Sydlišćowy puć 2, přizjewić, telefonowej čisle (01 63) 7 33 82 05 abo (03 57 96) 9 54 28 (po 19 hodź.).